



Na osnovu člana 140. Poslovnika Skupštine Kantona Sarajevo („Službene novine Kantona Sarajevo“ broj: 41/12- Drugi novi prečišćen tekst, 15/13 i 47/13), Skupština Kantona Sarajevo, na sjednici održanoj dana 27.05.2015. godine, donijela je slijedeći

Z A K L J U Č A K

1. Utvrđuje se Nacrt zakona o unutrašnjim poslovima Kantona Sarajevo i stavlja na javnu raspravu.

2. Javna rasprava održaće se u kantonalnim organima, jedinicama lokalne samouprave, naučnim i stručnim ustanovama i trajaće 30 dana.

3. Primjedbe, prijedlozi, sugestije zastupnika i mišljenja radnih tijela Skupštine dostavljaju se Vladi Kantona Sarajevo koja organizuje i provodi javnu raspravu.

4. Vlada Kantona Sarajevo dužna je da nakon provedene javne rasprave podnese Skupštini Izvještaj o rezultatima javne rasprave koji sadrži primjedbe, prijedloge i mišljenja kao i da obrazloženje razloga zbog kojih pojedine primjedbe, prijedlozi i mišljenja nisu prihvaćeni i pripremi Prijedlog zakona o unutrašnjim poslovima Kantona Sarajevo.

Broj: 01-02-16577/15
27.05.2015. godine
S A R A J E V O

PREDSJEDAVAJUĆI
SKUPŠTINE KANTONA SARAJEVO

Sejo Bukva



NACRT

Na osnovu člana 12. stav (1), tačka a) i 18. tačka (b) Ustava Kantona Sarajevo („ Službene novine Kantona Sarajevo “, broj : 1/96, 2/96, 3/96, 16/97, 14/00, 4/01, 28/04 i 06/13), Skupština Kantona Sarajevo, na sjednici održanoj dana 27.05.2015.godine, utvrdila je:

ZAKON

O UNUTRAŠNjim POSLOVIMA KANTONA SARAJEVO

POGLAVLJE I - OSNOVNE ODREDBE

Član 1.

(Predmet zakona)

Ovim Zakonom se utvrđuju unutrašnji poslovi iz nadležnosti Kantona Sarajevo (u daljem tekstu: Kanton); nadležnost, organizacija i rukovođenje Ministarstvom unutrašnjih poslova Kantona Sarajevo (u daljem tekstu: Ministarstvo), uključujući nadležnost, organizaciju i rukovođenje Upravom policije kao policijskim organom Kantona (u daljem tekstu: Uprava policije), imenovanje, sastav i funkcioniranje Nezavisnog odbora, imenovanje, sastav i funkcioniranje Odbora za žalbe javnosti, disciplinska odgovornost policijskog komesara, stručno obrazovanje, usavršavanje i nagrade uposlenika Ministarstva, međusobni odnosi Ministarstva sa drugim kantonalnim ministarstvima unutrašnjih poslova i policijskim organima u Bosni i Hercegovini, te druga pitanja od značaja za organizaciju, rad i ostvarivanje funkcije Ministarstva.

Član 2.

(Pravni osnov za rad Ministarstva)

- (1) Unutrašnje poslove na teritoriji Kantona vrši Ministarstvo.
- (2) Rad Ministarstva zasniva se na Ustavu Bosne i Hercegovine, Ustavu Federacije Bosne i Hercegovine, Ustavu Kantona, te zakonima i drugim propisima Bosne i Hercegovine (u daljem tekstu: BiH), Federacije Bosne i Hercegovine (u daljem tekstu: Federacija) i Kantona.

Član 3.

(Principi policijske službe)

Svi propisi koje donosi Ministarstvo, kao i sve radnje Ministarstva i njegovih uposlenika, moraju biti u skladu sa međunarodno prihvaćenim principima policijske službe, predviđenim u Sporazumu o reorganizaciji policije Federacije BiH, kojeg su vlasti Federacije potpisale u Bonn-Petersbergu 25. 04. 1996. godine.

Član 4.

(Nacionalna zastupljenost)

Sastav uposlenih u Ministarstvu i Upravi policije treba da odražava nacionalnu strukturu stanovništva na teritoriji Kantona, prema posljednjem važećem popisu stanovništva u Bosni i Hercegovini.

Član 5.
(Pravni status Uprave policije)

- (1) Uprava policije je kantonalna uprava u sastavu Ministarstva, čija se nadležnost, organizacija, rukovođenje i način rada i druga pitanja koja su od značaja za rad i funkcionisanje Uprave policije u okviru Ministarstva uređuje ovim zakonom.
- (2) Uprava policije je policijski organ, koji vrši policijske poslove i ima operativnu samostalnost.

Član 6.
(Budžetski status Uprave policije)

- (1) Uprava policije ima status samostalnog budžetskog korisnika unutar budžetskog razdjela Ministarstva.
- (2) Sredstva potrebna za rad Uprave policije koja nisu obuhvaćena stavom (1) ovog člana, osiguravaju se na budžetskoj poziciji Ministarstva.
- (3) Vlada Kantona Sarajevo (u daljem tekstu: Vlada Kantona) i ministar unutrašnjih poslova Kantona Sarajevo (u daljem tekstu: ministar), dužni su osigurati sve uvjete za samostalan i nesmetan rad Uprave policije radi efikasnog obavljanja svih poslova iz njene nadležnosti i omogućiti Upravi policije da samostalno koristi sredstva za rad.

Član 7.
(Priprema i izvršenje Budžeta)

- (1) Zahtjev za budžetska sredstva Uprave policije priprema policijski komesar i dostavlja ministru.
- (2) Zahtjev za dodjelu budžetskih sredstava Ministarstva, uključujući i sredstva iz stava 1. ovog člana, ministar dostavlja Vladi Kantona, putem Ministarstva finansija Kantona Sarajevo (u daljem tekstu: Ministarstvo finansija), na dalje postupanje.
- (3) Na procedure pripreme i podnošenja zahtjeva za budžetska sredstva Ministarstvu i Upravi policije, kao i druga pitanja koja se odnose na odgovornost za računovodstvo, internu kontrolu, nadzor i zakonitost raspolaganja budžetskim sredstvima, shodno se primjenjuju odredbe posebnih propisa kojima su uređena navedena pitanja.

POGLAVLJE II - UNUTRAŠNJI POSLOVI IZ NADLEŽNOSTI KANTONA

Član 8.
(Unutrašnji poslovi)

Unutrašnji poslovi iz nadležnosti Kantona su:

- a) zaštita života i imovine, kao i drugih prava i sloboda utvrđenih ustavima u BiH;
- b) sprečavanje, otkrivanje i istraga krivičnih djela i prekršaja na području Kantona u skladu sa zakonom;
- c) poslovi i zadaci koji se odnose na održavanje javnog reda i mira;
- d) poslovi i zadaci koji se odnose na održavanje javnih okupljanja;
- e) osiguranje posebno određenih ličnosti i objekata Kantona;
- f) kriminalističko tehnička vještačenja;

- g) poslovi sigurnosti, kontrole i regulisanja saobraćaja na putevima Kantona, te druge poslove sigurnosti u oblasti saobraćaja, utvrđeni posebnim zakonom i podzakonskim aktima;
- h) saradnja sa drugim ministarstvima unutrašnjih poslova i drugim organima u BiH u okviru nadležnosti Ministarstva;
- i) poslove izdavanja odobrenja za nabavljanje, držanje i nošenje oružja i municije, vođenje propisanih evidencija i vršenje i drugih poslova i zadataka propisanih Zakonom o nabavljanju, držanju i nošenju oružja i municije;
- j) drugi poslovi i zadaci policije koje Ministarstvu povjere Tužilaštva u BiH;
- k) poslovi izdavanja, poništavanja i zamjene ličnih karata i jedinstvenog matičnog broja građana i vođenja evidencija;
- l) poslovi izdavanja, poništavanja i zamjene putnih isprava;
- m) registracija motornih vozila;
- n) poslovi izdavanja i zamjene vozačkih dozvola;
- o) poslovi prijavljivanja, odjavljivanja i vođenja evidencije o prebivalištu i boravištu građana;
- p) ažuriranje i čuvanje duplikata matičnih knjiga i nadzor nad primjenom propisa u oblasti matičnih knjiga;
- r) promjena ličnog imena;
- s) poslovi koji se odnose na sticanje državljanstva Federacije i promjenu entitetskog državljanstva;
- š) poslovi inspeksijskog nadzora u oblasti zaštite od požara iz nadležnosti Ministarstva;
- t) poslovi koji se odnose na oblast proizvodnje, prometa i skladištenja eksplozivnih, zapaljivih i ostalih opasnih materija, koji su u nadležnosti Kantona;
- u) poslovi koji se odnose na rad agencija za zaštitu ljudi i imovine i unutrašnjih zaštitarskih službi i inspeksijski nadzor u navedenoj oblasti;
- v) inspeksijski nadzor u oblastima iz svoje nadležnosti;
- z) obavljanje drugih poslova i zadataka koje Federalno ministarstvo unutrašnjih poslova povjeri Ministarstvu iz svoje nadležnosti;
- ž) upravni i drugi poslovi i zadaci stavljeni u nadležnost Ministarstva u skladu sa ovim i drugim zakonima.

Član 9.

(Zajednička nadležnost i povjereno vršenje poslova)

- (1) U slučaju kada je Ministarstvu povjereno vršenje poslova iz nadležnosti Federacije ili prilikom vršenja poslova iz zajedničke nadležnosti Federacije i Kantona, Ministarstvo neposredno primjenjuje zakone i druge propise Federacije.
- (2) Ministarstvo unutrašnjih poslova Federacije nadzire sprovođenje propisa iz stava (1) ovog člana.

Član 10.

(Rješavanje sukoba nadležnosti između Federalnog ministarstva i Ministarstva)

- (1) U slučaju sukoba nadležnosti između Federalnog ministarstva i Ministarstva, i između drugog kantonalnog ministarstva unutrašnjih poslova (u daljnjem tekstu: kantonalno ministarstvo) i Ministarstva, Ustavni sud Federacije Bosne i Hercegovine riješit će to svojom odlukom.
- (2) Ako je potrebno hitno postupiti radi spriječavanja nastanka neotklonjivih štetnih posljedica do odluke Ustavnog suda Federacije Bosne i Hercegovine primjenjivat će se odluka koju donese ministar unutrašnjih poslova Federacije Bosne i Hercegovine.

- (3) Kada ministar unutrašnjih poslova Federacije Bosne i Hercegovine donese odluku iz stava (2) ovog člana, dužan je o tome odmah obavijestiti premijera Vlade Federacije i rukovodioca kantonalnog ministarstva na kojeg se ta odluka odnosi.

Član 11.
(Ličnosti i objekti pod posebnim osiguranjem)

Vlada Kantona uredbom određuje koje se ličnosti i objekti Kantona posebno osiguravaju.

Član 12.
(Pružanje pomoći drugim organima i pravnim licima)

- (1) Uprava policije pruža pomoć drugim organima, preduzećima i drugim pravnim licima kojima je povjereno vršenje javnih ovlaštenja, radi osiguranja izvršenja poslova iz njihove nadležnosti, ako se prilikom izvršenja tih poslova i zadataka naide na fizički otpor ili se takav otpor može osnovano očekivati.
- (2) O načinu i obimu pružanja pomoći u skladu sa stavom (1) ovog člana odlučuje načelnik policijske uprave, prema mjestu pružanja pomoći. Ukoliko se pomoć pruža na području više policijskih uprava, o pomoći odlučuje načelnik Sektora uniformisane policije.
- (3) Kada ocijeni, da se prilikom pružanja pomoći iz stava (1) ovog člana može očekivati organizirani masovni fizički otpor ili upotreba oružja, načelnik nadležne policijske uprave odnosno načelnik Sektora uniformisane policije je dužan, prije donošenja odluke iz stava (2) ovog člana, pribaviti pismenu saglasnost policijskog komesara.
- (4) Način i obim pružanja pomoći, kao i postupanje policijskih službenika, detaljnije propisuje ministar podzakonskim propisom na prijedlog policijskog komesara.

Član 13.
(Pružanje pomoći u vanrednim situacijama)

Uprava policije pruža pomoć organima uprave, jedinicama lokalne samouprave, pravnim i fizičkim licima i u slučajevima opće opasnosti uzrokovane prirodnim nepogodama, epidemijama i drugim vanrednim okolnostima.

POGLAVLJE III – (UNUTRAŠNJA ORGANIZACIJA I NADLEŽNOSTI MINISTARSTVA)

Odjeljak A. Unutrašnja organizacija

Član 14.
(Unutrašnja organizacija Ministarstva i Uprave policije)

Unutrašnja organizacija Ministarstva i Uprave policije uređuje se Pravilnikom o unutrašnjoj organizaciji Ministarstva, u skladu sa ovim zakonom i drugim propisima.

Član 15.
(Pravilnik o unutrašnjoj organizaciji)

- (1) Pravilnik o unutrašnjoj organizaciji Ministarstva (u daljem tekstu: Pravilnik) donosi ministar, uz saglasnost Vlade Kantona.
- (2) Dio Pravilnika koji se odnosi na Upravu policije utvrđuje ministar, na prijedlog policijskog komesara.
- (3) Pravilnikom utvrđuju se:
 - a) organizacione jedinice i njihova nadležnost;
 - b) sistematizacija radnih mjesta, koja obuhvata: naziv radnog mjesta, opis poslova, uvjete za obavljanje poslova, čin za radna mjesta policijskih službenika, vrstu djelatnosti, naziv grupe u koju spadaju poslovi, složenost poslova i druge elemente;
 - c) način rukovođenja ministarstvom, Upravom policije i njihovim organizacionim jedinicama;
 - d) programiranje i planiranje poslova;
 - e) ovlaštenja i odgovornosti rukovodećih policijskih i državnih službenika, prilikom obavljanja poslova iz svoje nadležnosti;
 - f) broj pripravnika koji se primaju u radni odnos i uvjeti za prijem pripravnika za radna mjesta državnih službenika i namještenika;
 - g) druga pitanja od značaja za organizaciju i način rada ministarstva.

Odjeljak B. Osnovne organizacione jedinice Ministarstva

Član 16.
(Osnovne organizacione jedinice)

- (1) Ministarstvo poslove i zadatke iz svoje nadležnosti obavlja u okviru osnovnih organizacionih jedinica koje se utvrđuju Pravilnikom.
- (2) Unutar osnovnih organizacionih jedinica, ministar može utvrditi unutrašnje organizacione jedinice, kako bi se na adekvatan i efikasan način osiguralo vršenje poslova iz nadležnosti rada osnovnih organizacionih jedinica Ministarstva.

Član 17.
(Nadležnosti organizacionih jedinica Ministarstva)

U okviru poslova iz člana 8. ovog Zakona, Ministarstvo, preko svojih osnovnih organizacionih jedinica, obavlja sljedeće poslove:

- a) izdavanje, poništavanje i zamjena ličnih karata i jedinstvenog matičnog broja građana i vođenje evidencija;
- b) izdavanje, poništavanje i zamjena putnih isprava;
- c) izdavanje i zamjena vozačkih dozvola;
- d) registracija motornih vozila;
- e) promjena ličnog imena;
- f) ažuriranje i čuvanje duplikata matičnih knjiga i nadzor nad primjenom propisa u oblasti matičnih knjiga;
- g) sticanje državljanstva Federacije i promjena entitetskog državljanstva;
- h) prijavljivanje, odjavljivanje i vođenje evidencija o prebivalištu i boravištu građana;

- i) poslovi inspekcijskog nadzora u oblasti zaštite od požara iz nadležnosti Ministarstva;
- j) poslovi koji se odnose na rad agencija za zaštitu ljudi i imovine i unutrašnjih zaštitarskih službi i inspekcijski nadzor u navedenoj oblasti;
- k) inspekcijski nadzor u oblastima iz svoje nadležnosti;
- l) drugi poslovi propisani zakonom.

Odjeljak C - Uprava policije

Član 18.

(Unutrašnja organizacija Uprave policije)

- (1) Osnovne organizacione jedinice Uprave policije su:
 - a) Ured policijskog komesara;
 - b) Sektor uniformisane policije;
 - c) Sektor kriminalističke policije;
 - d) Sektor za pravne, kadrovske, logističke poslove, edukaciju i analitiku;
 - e) Jedinica za profesionalne standarde;
 - f) policijske uprave.
- (2) Ako je to neophodno i adekvatnije odgovara prirodi određenih poslova, pored osnovnih organizacionih jedinica iz stava 1. ovog člana, ministar može na prijedlog policijskog komesara u Pravilniku o unutrašnjoj organizaciji Ministarstva utvrditi i druge osnovne organizacione jedinice u Upravi policije, koje će na odgovarajući način osigurati vršenje poslova i zadataka, u skladu s članom 53. stav 2. Zakona o organizaciji organa uprave u Federaciji Bosne i Hercegovine.
- (3) Unutar osnovnih organizacionih jedinica, Pravilnikom o unutrašnjoj organizaciji mogu se utvrditi unutrašnje organizacione jedinice, kako bi se na adekvatan i efikasan način osiguralo vršenje poslova iz nadležnosti osnovnih organizacionih jedinica Uprave policije.

Član 19.

(Nadležnosti Uprave policije)

U okviru poslova iz člana 8. ovog Zakona, Uprava policije preko svojih organizacionih jedinica, obavlja slijedeće poslove:

- a) zaštita života i imovine, kao i drugih prava i sloboda utvrđenih ustavima u Bosni i Hercegovini;
- b) sprečavanje, otkrivanje i istraga krivičnih djela i prekršaja na području Kantona u skladu sa zakonom;
- c) prikupljanja i analize informacija i podataka iz tačke b) ovog člana, kao i o ukupnoj sigurnosnoj situaciji u Kantonu;
- d) poslove i zadatke koji se odnose na održavanje javnog reda i mira;
- e) poslove i zadatke koji se odnose na održavanje javnih okupljanja;
- f) osiguranje posebno određenih ličnosti i objekata Kantona;
- g) kriminalističko-tehnička vještačenja;
- h) kontrola i regulacija saobraćaja na putevima Kantona, te drugi poslovi u oblasti saobraćaja utvrđeni zakonom;

- i) poslove izdavanja odobrenja za nabavljanje, držanje i nošenje oružja i municije, vođenje propisanih evidencija i vršenje i drugih poslova i zadataka propisanih Zakonom o nabavljanju, držanju i nošenju oružja i municije;
- j) poslovi koji se odnose na oblast proizvodnje, prometa i skladištenja eksplozivnih, zapaljivih i opasnih materija iz nadležnosti Kantona.
- k) vođenje kaznenih i prekršajnih evidencija i ustupanje istih nadležnim organima u skladu sa važećim zakonima i propisima i vođenje drugih službenih evidencija potrebnih za obavljanje zadataka iz nadležnosti Uprave policije u skladu sa važećim zakonima i propisima;
- l) razmjene informacija sa tužilaštvima, sudovima i drugim policijskim organima u Bosni i Hercegovini;
- m) saradnja sa drugim policijskim organima, sigurnosnim agencijama i drugim organima u BiH, u okviru nadležnosti Uprave policije;
- n) pružanje pomoći drugim državnim organima i pravnim licima kojima je povjereno vršenje javnih ovlaštenja u skladu sa posebnim propisima;
- o) druge poslove i zadatke policije koje Upravi policije povjere tužilaštva u BiH;
- p) poslovi modernizacije i opremanja za informacioni i radio-relejni sistem Ministarstva i izrada projekata računarske obrade podataka;
- r) druge poslove i zadatke utvrđene zakonom i drugim propisima;

POGLAVLJE IV – RUKOVOĐENJE

Odjeljak A. Rukovođenje Ministarstvom

Član 20.

(Ovlaštenja ministra u rukovođenju Ministarstvom)

- (1) Ministarstvom rukovodi ministar.
- (2) U cilju provođenja kantonalne politike i prioriteta u vezi sa unutrašnjim poslovima, provođenja kantonalnih zakona i izvršavanja zadataka povjerenih od strane Vlade Kantona, pored zadataka utvrđenih drugim zakonima, ministar:
 - a) predstavlja Ministarstvo;
 - b) vrši nadzor nad provođenjem zakona i drugih propisa iz nadležnosti ministarstva;
 - c) utvrđuje prioritete i politiku Ministarstva;
 - d) predlaže donošenje zakona i drugih propisa iz nadležnosti Ministarstva;
 - e) donosi provedbene propise i druge opće i pojedinačne akte iz svoje nadležnosti u svrhu provođenja zakona i drugih propisa u oblasti unutrašnjih poslova,
 - f) organizuje rad Ministarstva,
 - g) osigurava zakonito i efikasno funkcionisanje Ministarstva;
 - h) odlučuje u upravnim stvarima na način propisan zakonom;
 - i) organizuje jedinstven sistem izvještavanja i obrade podataka u oblasti unutrašnjih poslova neophodnih za vršenje poslova Ministarstva;
 - j) osigurava saradnju Ministarstva sa drugim državnim organima u Bosni i Hercegovini;
 - k) izvršava i druge poslove i zadatke koje mu povjeri Vlada Kantona, kao i druge poslove utvrđene zakonima Kantona, Federacije i Bosne i Hercegovine.

- (3) Prema osnovnim organizacionim jedinicama Ministarstva, ministar:
- a) upravlja i usmjerava obavljanje poslova iz nadležnosti organizacionih jedinica;
 - b) obrazuje upravne i druge stručne komisije i odgovarajuća radna tijela;
 - c) odlučuje o korištenju sredstava i vrši nabavku opreme i materijalno-tehničkih sredstava, osim sredstava utvrđenih za namjene iz člana 6. ovog Zakona;
 - d) odlučuje o pravima, obavezama i odgovornostima državnih službenika i namještenika Ministarstva, osim onih koji su pod nadležnošću policijskog komesara, u skladu sa ovim Zakonom i drugim propisima;
 - e) izvršava druge poslove i zadatke koje mu povjeri Vlada Kantona, kao i druge poslove utvrđene zakonom.
- (4) Za vršenje nekih od poslova iz stava (2) i (3) ovog člana ministar može prenijeti svoja ovlaštenja sekretaru Ministarstva ili rukovodiocima osnovnih organizacionih jedinica.
- (5) Prema Upravi policije ministar je ovlašten da:
- a) na prijedlog policijskog komesara donosi podzakonske propise i druge opće i pojedinačne akte za koje je zakonom ovlašten;
 - b) prati rad policijskog komesara;
 - c) utvrđuje politike i prioritete u vezi sveobuhvatnih sigurnosnih pitanja;
 - d) daje svoje izjašnjenje na predloženu godišnju ocjenu o radu policijskog komesara na način predviđen u članu 45. ovog Zakona;
 - e) na prijedlog policijskog komesara usvaja plan policijskih poslova Uprave policije i
 - f) vrši druga ovlaštenja koja su mu ovim Zakonom i drugim propisima data u nadležnost.

Član 21. **(Zamjena ministra)**

- (1) U slučaju privremene spriječenosti ministra do 30 dana, funkciju ministra vrši sekretar ministarstva, a kada se razmatraju materijali iz nadležnosti ministarstva sjednicama Vlade Kantona prisustvuje sekretar bez prava glasa.
- (2) Ukoliko ministar, zbog odsustva ili drugih stvarnih ili pravnih razloga, ne može vršiti svoju funkciju duže od 30 dana, funkciju ministra vrši član Vlade Kantona kojeg odredi premijer, dok on ne bude u stanju da ponovo preuzme funkciju ili dok se ne imenuje novi ministar.

Odjeljak B. - Rukovođenje Upravom policije

Član 22. **(Ovlaštenja policijskog komesara u rukovođenju Upravom policije)**

- (1) Policijski komesar je rukovodilac Uprave policije.
- (2) Policijski komesar rukovodi Upravom policije i odgovoran je za svoj rad ministru i Vladi Kantona.
- (3) U rukovođenju Upravom policije, policijski komesar:
 - a) predstavlja Upravu policije;
 - b) nadgleda i usmjerava aktivnosti Uprave policije;
 - c) odlučuje u upravnim stvarima iz nadležnosti Uprave policije;

- d) donosi propise na koje je ovlašten zakonom i vrši izmjene ili dopune istih, te dostavlja ministru nacrt i prijedloge propisa ili izmjene i dopune propisa iz djelokruga rada Uprave policije;
 - e) odlučuje o zasnivanju radnog odnosa i prestanku radnog odnosa, kao i o pravima, obavezama i odgovornostima iz radnog odnosa policijskih službenika, državnih službenika i namještenika uposlenih u Upravi policije;
 - f) odlučuje o disciplinskoj odgovornosti policijskih službenika za lakšu povredu službene dužnosti;
 - g) priprema prijedloge potrebnih finansijskih i drugih sredstava za rad Uprave policije;
 - h) odlučuje o korištenju sredstava i vrši nabavku opreme i materijalno-tehničkih sredstava u skladu sa namjenom odobrenih sredstava na budžetskoj poziciji Uprave policije;
 - i) priprema tromjesečne izvještaje i preporuke u vezi sa realizacijom budžeta, koje podnosi ministru;
 - j) predlaže ukupan broj uposlenika u Upravi policije;
 - k) obrazuje stručne komisije i odgovarajuća radna tijela;
 - l) utvrđuje potrebe, određuje i implementira programe stručnog osposobljavanja i usavršavanja uposlenika Uprave policije;
 - m) organizuje jedinstven sistem izvještavanja i obrade podataka neophodnih za vršenje nadležnosti Uprave policije;
 - n) raspisuje kantonalne potrage i i oglašava raspisane potrage;
 - o) osigurava saradnju sa drugim policijskim organima i agencijama za sprovođenje zakona u BiH, te sarađuje sa tužilaštvima, sudovima i drugim nadležnim pravosudnim organima u pitanjima iz nadležnosti Uprave policije;
 - p) priprema programe, informacije, analize i druge materijale iz djelokruga rada Uprave policije na zahtjev ministra, Vlade Kantona ili na vlastitu inicijativu;
 - r) redovno izvještava ministra o poduzetim aktivnostima Uprave policije;
 - s) obavještava javnost o radu Uprave policije;
 - š) podnosi informacije i statističke podatke Federalnom ministarstvu, u vezi sa poslovima iz zajedničke nadležnosti Kantona i Federacije, kao i poslova iz nadležnosti Federacije koji su povjereni Ministarstvu;
 - t) odlučuje o načinu osiguranja određenih ličnosti i objekata;
 - u) vrši druga ovlaštenja koja su mu ovim zakonom i drugim propisima data u nadležnost.
- (4) Policijski komesar može ovlastiti načelnika Sektora uniformisane policije i načelnika Sektora kriminalističke policije ili rukovodioce organizacionih jedinica da vrše određene poslove iz stava (3) ovog člana.

Član 23.

(Zamjena policijskog komesara)

- (1) Ukoliko policijski komesar zbog prestanka mandata, smjene, ostavke, bolesti, odsustva ili drugih stvarnih ili pravnih razloga, ne može vršiti svoja ovlaštenja u rukovođenju Upravom policije, te poslove vrši načelnik Sektora uniformisane policije, sve dok policijski komesar ne bude u stanju da ponovo preuzme svoju dužnost ili dok se ne imenuje novi policijski komesar. Načelnik Sektora uniformisane policije preuzima dužnosti dan nakon nastupanja navedenih okolnosti.
- (2) Za vrijeme dok mijenja policijskog komesara u njegovom odsustvu, načelnik Sektora uniformisane policije ima sva prava, obaveze i ovlaštenja policijskog komesara predviđena u članu 22. ovog Zakona, kao i pravo na naknadu razlike plaće do nivoa osnovne plaće policijskog komesara ako vrši te poslove duže od 30 dana uzastopno.

- (3) Ukoliko je i načelnik Sektora uniformisane policije zbog pravnih ili drugih stvarnih razloga spriječen da vrši poslove iz stava (1) ovog člana, načelnik Sektora kriminalističke policije zamjenjuje policijskog komesara, sve dok on ne bude u stanju da ponovo preuzme svoju dužnost ili dok se ne imenuje novi policijski komesar i ostvaruje prava iz stava (2) ovog člana.
- (4) Ukoliko policijskom komesaru prestane mandat zbog smjene, prihvatanja ostavke, isteka mandata ili nemogućnosti da ponovo preuzme poslove, Vlada Kantona imenuje novog policijskog komesara, u skladu sa zakonom.

POGLAVLJE V – NEZAVISNI ODBOR I PROCES IZBORA, IMENOVANJE, MANDAT, NADZOR I SMJENA POLICIJSKOG KOMESARA

Odjeljak A - Nezavisni odbor

Član 24.

(Nezavisni odbor)

- (1) Radi osiguranja nepristrasne, objektivne, kvalitetne i zakonite procedure imenovanja policijskog komesara, lišene svakog političkog utjecaja, formira se Nezavisni odbor koji omogućava da za policijskog komesara budu predloženi najkvalitetniji kandidati, kao i osiguranje stručnog, objektivnog i nepristrasnog praćenja rada policijskog komesara i obavljanje drugih poslova utvrđenih ovim Zakonom.
- (2) Na prijedlog Komisije za izbor i imenovanja Skupštine Kantona Sarajevo (u daljem tekstu: Komisija za izbor i imenovanja), Skupština Kantona Sarajevo (u daljem tekstu: Skupština Kantona) imenuje Nezavisni odbor.
- (3) Nezavisni odbor je nezavisno tijelo Skupštine Kantona koje provodi postupak izbora i smjene policijskog komesara, te vrši nadzor nad njegovim radom.
- (4) Nezavisni odbor radi isključivo na profesionalnim osnovama, ne zastupajući, ne štiteći niti podrivajući interese bilo koje političke stranke, registrovane organizacije ili udruženja, ili bilo kojeg naroda u Bosni i Hercegovini.

Član 25.

(Sastav Nezavisnog odbora)

- (1) Nezavisni odbor se sastoji od sedam članova.
- (2) Članovi Nezavisnog odbora biraju se iz reda istaknutih stručnjaka iz oblasti pravnih, društvenih i kriminalističkih nauka te iz organizacija koje se bave zaštitom ljudskih prava ili drugih srodnih oblasti, a koji nisu zaposleni u organima unutrašnjih poslova u Bosni i Hercegovini.
- (3) Najmanje jedan član Nezavisnog odbora mora biti diplomirani pravnik odnosno Bakalaureat/Bachelor prava sa ostvarenih 240 ECTS studijskih bodova.
- (4) Sastav Nezavisnog odbora treba da odražava nacionalni sastav stanovništava na teritoriji Kantona prema posljednjem važećem popisu stanovništva u Bosni i Hercegovini.
- (5) U toku izbornog postupka, vodiće se računa o polnoj zastupljenosti.

Član 26.

(Kriteriji za članstvo u Nezavisnom odboru)

- (1) Član Nezavisnog odbora može biti svako lice koje:
 - a) je državljanin Bosne i Hercegovine

- b) ima najmanje VII stepen školske spremlje ili 240 ECTS studijskih bodova i najmanje pet godina radnog iskustva, nakon sticanja visoke školske spremlje u oblasti pravnih, kriminalističkih, sigurnosnih ili drugih društvenih nauka;
- c) nije član političke stranke;
- d) u posljednje 4 godine nije bio na bilo kojoj poziciji u političkoj stranci na bilo kojem nivou, niti je bio postavljen na bilo koju poziciju od strane političke stranke;
- e) u posljednje četiri godine nije bio član izvršnog ili zakonodavnog tijela na bilo kojem nivou vlasti u Bosni i Hercegovini;
- f) nije osuđivan za krivično djelo,
- g) da se protiv njega ne vodi krivični postupak,
- h) da mu nije izrečena disciplinska sankcija za teže povrede službene dužnosti,
- i) da nije aktivni policijski službenik;

Član 27.

(Sukob interesa)

- (1) Član Nezavisnog odbora ne smije imati sukob interesa s radom policijskog organa i Ministarstva.
- (2) Sukob interesa postoji kada lice predloženo za imenovanje ima lični interes u policijskim poslovima, koji mogu utjecati na zakonitost, transparentnost, objektivnost i nepristrasnost u vršenju funkcije u Nezavisnom odboru.

Član 28.

(Imenovanje Nezavisnog odbora i trajanje mandata)

- (1) Nezavisni odbor se imenuje na mandatni period od četiri godine.
- (2) Članovi Nezavisnog odbora iz stava (1) ovog člana mogu biti ponovno izabrani u Nezavisni odbor samo jednom uzastopno.
- (3) Postupak izbora novog saziva Nezavisnog odbora pokreće se najkasnije šest mjeseci prije isteka mandata imenovanog Nezavisnog odbora.
- (4) Ukoliko mandat Nezavisnog odbora istekne prije imenovanja novog Nezavisnog odbora, postojeći Nezavisni odbor nastavlja u kontinuitetu vršiti svoje dužnosti sve do imenovanja novog Nezavisnog odbora.
- (5) Odredbe Zakona o ministarskim, vladinim i drugim imenovanjima F BiH ("Službene novine Federacije BiH", broj 34/03), se primjenjuju na izbor članova Nezavisnog odbora, ukoliko nije drugačije određeno ovim Zakonom.

Član 29.

(Finansiranje Nezavisnog odbora)

- (1) Rad Nezavisnog odbora finansira se iz Budžeta Skupštine Kantona.
- (2) Član Nezavisnog odbora ima pravo na mjesečnu naknadu za svoj rad čiju visinu utvrđuje Skupština.

Član 30.
(Smjena člana Nezavisnog odbora)

- (1) Skupština Kantona će smijeniti člana Nezavisnog odbora ako:
 - a) prestane ispunjavati bilo koji od uslova na osnovu kojih je imenovan za člana Nezavisnog odbora,
 - b) ne obavlja poslove u skladu sa Zakonom i usvojenim Poslovnikom o radu Nezavisnog odbora,
 - c) ukoliko neopravdano ne prisustvuje uzastopno na tri sjednice Nezavisnog odbora,
 - d) po ocjeni nadležne zdravstvene institucije postane trajno nesposoban za obavljanje svojih dužnosti.
- (2) Član Nezavisnog odbora je dužan obavijestiti Komisiju za izbor i imenovanja o bilo kakvim promijenjenim okolnostima koje mogu uticati na njegovo članstvo.
- (3) Svaka druga zainteresirana osoba može obavijestiti Komisiju za izbor i imenovanja o postojanju razloga iz stava (1) i (2) ovog člana.
- (4) Komisija za izbor i imenovanja je dužna provjeriti navode u roku od 15 dana od dana saznanja za postojanje razloga iz stava (1) i (2) ovog člana.
- (5) Ukoliko utvrdi postojanje razloga za smjenu člana Nezavisnog odbora, Komisija za izbor i imenovanja odmah pokreće postupak smjene, te izbora novog člana, a Skupština Kantona ga imenuje.
- (6) Smjena jednog ili više članova Nezavisnog odbora ne smije uticati na rad Nezavisnog odbora koji nastavlja sa svojim radom, uključujući i donošenje odluka, dok Skupština Kantona ne izvrši imenovanje novog člana ili članova.

Član 31.
(Ostavka člana Nezavisnog odbora)

- (1) Član Nezavisnog odbora može podnijeti ostavku. Ostavka se podnosi Skupštini Kantona.
- (2) Ostavka jednog ili više članova Nezavisnog odbora ne smije utjecati na rad Nezavisnog odbora. Član Nezavisnog odbora u ostavci nastavlja da obavlja svoje dužnosti, uključujući i donošenje odluka, sve dok Skupština Kantona ne izvrši imenovanje novog člana ili članova. Komisija za izbor i imenovanja je dužna odmah započeti postupak izbora novog člana.

Član 32.
(Nadležnosti Nezavisnog odbora)

Nezavisni odbor obavlja sljedeće poslove iz svoje nadležnosti:

- a) Raspisuje i provodi Javni konkurs za imenovanje policijskog komesara;
- b) Vršiti selekciju i predlaže listu kandidata za izbor policijskog komesara Vladi Kantona koju dostavlja posredstvom ministra;
- c) Prati rad policijskog komesara i izvještava Skupštinu Kantona;
- d) Predlaže smjenu policijskog komesara Vladi Kantona u skladu sa ovim Zakonom;
- e) Vodi prvostepeni disciplinski postupak protiv policijskog komesara i izriče disciplinske sankcije;
- f) Prima, razmatra i postupa po podnesenim žalbama na rad policijskog komesara;
- g) Donosi Poslovnik o svom radu u skladu sa članom 56. ovog Zakona;

h) Obavlja i druge poslove koji su stavljeni u njegovu nadležnost ovim Zakonom.

Član 33.

(Funkcioniranje i odlučivanje Nezavisnog odbora)

- (1) Nezavisni odbor je dužan najkasnije u roku od 15 dana od dana imenovanja, u punom sazivu, održati konstituirajuću sjednicu i usvojiti Poslovnik o radu u skladu sa članom 56. ovog Zakona.
- (2) Na prvoj konstituirajućoj sjednici članovi između sebe biraju predsjedavajućeg Nezavisnog odbora.
- (3) Administrativne poslove za Nezavisni odbor obavlja administrativna i stručna služba Skupštine Kantona.
- (4) Nezavisni odbor sačinjava izvještaj o svom radu svakih šest mjeseci i dostavlja ga Skupštini Kantona na razmatranje.
- (5) Na zahtjev Skupštine Kantona Nezavisni odbor sačinjava dodatne izvještaje o svom radu.
- (6) Nezavisni odbor donosi odluke ukoliko ima kvorum.
- (7) Nezavisni odbor ima kvorum ukoliko je pet od sedam članova prisutno.
- (8) Na redovnim sjednicama Nezavisni odbor donosi odluke, za koje su glasale najmanje četiri člana.
- (9) Odluka o izboru, prijedlogu o smjeni, godišnjoj ocjeni rada policijskog komesara i disciplinskoj odgovornosti policijskog komesara je donesena, ako je za nju glasalo najmanje pet članova.
- (10) Odluke se donose javno, a zapisnik o glasanju članova Nezavisnog odbora koji sadrži izjašnjenje svakog člana je dostupan javnosti.

Odjeljak B - Postupak izbora i imenovanja policijskog komesara

Član 34.

(Uslovi za radno mjesto policijskog komesara)

Za radno mjesto policijskog komesara kandidat mora ispunjavati sljedeće uslove:

- a) da je državljanin Bosne i Hercegovine;
- b) da je zdravstveno sposoban za vršenje poslova;
- c) da ima VII stepen stručne spreme ili 240 ECTS studijskih bodova;
- d) da ima najmanje tri godine radnog iskustva u činu glavnog inspektora ili višem činu;
- e) da mu nije pravomoćnom presudom izrečena krivično pravna sankcija;
- f) da protiv njega nije pokrenut krivični postupak i potvrđena optužnica u skladu sa zakonima o krivičnom postupku u Bosni i Hercegovini;
- g) da se na njega ne odnosi odredba člana IX 1. Ustava Bosne i Hercegovine;
- h) da ne ispunjava uslove za penzionisanje, predviđene zakonom u toku mandata;
- i) da nije bio član političke stranke, niti je bio na bilo kojoj poziciji u političkoj stranci na bilo kojem nivou, niti je bio postavljen na bilo koju poziciju u organima vlasti od političke stranke u posljednjih pet godina;
- j) da nije, niti je bio član izvršnog ili zakonodavnog tijela na bilo kojem nivou vlasti u Bosni i Hercegovini u posljednjih pet godina;
- k) da nije disciplinski kažnjavao za teže povrede službene dužnosti.

Član 35.
(Postupak izbora kandidata)

- (1) Izbor policijskog komesara vrši se javnim konkursom.
- (2) Postupak odabira novog policijskog komesara mora započeti najkasnije tri mjeseca prije isteka mandata imenovanog policijskog komesara.
- (3) Nezavisni odbor donosi odluku o pokretanju postupka odabira i raspisivanja konkursa.
- (4) Princip transparentnosti i zakonitosti se primjenjuju tokom postupka izbora i imenovanja.

Član 36.
(Objavljivanje konkursa za radno mjesto policijskog komesara)

- (1) Konkurs za radno mjesto policijskog komesara objavljuje se u "Službenim novinama Federacije BiH" i u najmanje dva dnevna lista koja se distribuiraju na cijelom teritoriju BiH.
- (2) Rok za podnošenje prijava je petnaest dana od dana zadnjeg objavljivanja.
- (3) Konkurs sadrži:
 - a) opis poslova radnog mjesta policijskog komesara;
 - b) uslove iz člana 34. ovog Zakona;
 - c) spisak potrebnih dokumenata;
 - d) rok za podnošenje prijava i mjesto podnošenja;
 - e) druge činjenice relevantne za provođenje konkursne procedure.

Član 37.
(Postupak izbora)

- (1) Nakon zaprimanja prijava Nezavisni odbor:
 - a) pregleda prijave;
 - b) uzima u obzir sve prijave primljene u propisanom roku;
 - c) sačinjava spisak kandidata koji ispunjavaju uslove konkursa;
 - d) obavlja razgovor sa kandidatima sa spiska.

Član 38.
(Kriteriji odabira)

- (1) Kandidati koji ispunjavaju uslove konkursa dostavljaju prijedlog plana i programa rada za vrijeme trajanja svog mandata.
- (2) Pored razgovora, u procesu odabira Nezavisni odbor uzima u obzir slijedeće kvalifikacije:
 - a) akademska zvanja;
 - b) stručno usavršavanje;
 - c) godine policijskog iskustva na rukovodećim radnim mjestima;
 - d) ocjenu rada u posljednje 3 godine i
 - e) ostale kvalifikacije koje odgovaraju potrebama radnog mjesta.

- (3) Pored dokumentacije iz člana 34. ovog Zakona, kandidat koji se poziva na razgovor dostavlja i dokumentaciju kojom dokazuje kvalifikacije iz stava (2) ovog člana.
- (4) Nezavisni odbor rangira kandidate na osnovu rezultata razgovora, ocjene kvalifikacija i predloženog plana rada iz stava (1) i (2) ovog člana.

Član 39.
(Prijedlog ministru)

Poslije obavljenog razgovora, a najkasnije u roku od petnaest dana od dana isteka roka za podnošenje prijava, Nezavisni odbor upućuje Vladi Kantona posredstvom ministra obrazložen prijedlog sa najmanje dva kandidata zajedno sa dokumentacijom priloženom uz prijavu.

Član 40.
(Prijedlog Vladi Kantona)

- (1) Najkasnije u roku od osam dana od prijema rezultata odabira od Nezavisnog odbora iz člana 39. ovog Zakona, ministar upućuje obrazložen prijedlog Nezavisnog odbora sa imenima dva predložena kandidata Vladi Kantona, na imenovanje.
- (2) Ukoliko ministar ne uputi prijedlog kandidata u roku iz stava 1. ovog člana, Nezavisni odbor dostavlja prijedlog sa imenima dva kandidata direktno Vladi Kantona, koja će imenovati jednog od kandidata za policijskog komesara.

Član 41
(Ponavljanje procesa izbora i prijedlog jednog kandidata)

- (1) Ukoliko Nezavisni odbor na osnovu objavljenog konkursa ne može sačiniti listu od najmanje dva kandidata koji ispunjavaju uslove konkursa, konkurs će se ponoviti u roku od 15 dana od dana okončanja objavljenog konkursa.
- (2) Ukoliko po ponovljenom konkursu Nezavisni odbor ne može sačiniti listu od najmanje dva kandidata, biće predložen kandidat koji ispunjava uslove iz konkursa, te će putem ministra prijedlog biti dostavljen Vladi Kantona na odlučivanje.
- (3) Ministar će prijedlog iz stava (2) ovog člana proslijediti Vladi Kantona u roku od 8 dana od dana prijema prijedloga.
- (4) Ukoliko ministar ne uputi prijedlog kandidata u roku iz stava (3) ovog člana, Nezavisni odbor dostavlja prijedlog sa imenom kandidata iz stava (2) ovog člana direktno Vladi Kantona 8 dana nakon isteka roka iz stava (3) ovog člana.

Član 42.
(Imenovanje policijskog komesara)

- (1) U roku od 30 dana, od dana prijema prijedloga, u skladu sa članom 40. odnosno članom 41. ovog zakona, Vlada Kantona donosi odluku o imenovanju predloženog kandidata na radno mjesto policijskog komesara, koja se objavljuje u "Službenim novinama Kantona Sarajevo".
- (2) Policijski komesar daje pismenu izjavu o imovinskom stanju, koja će biti dostupna javnosti.

Član 43.
(Mandat policijskog komesara)

- (1) Mandat policijskog komesara je 4 godine i može se obnoviti samo jednom uzastopno.
- (2) O pojedinačnim pravima, dužnostima policijskog komesara koja se odnose na radno pravni status, odlučuje se rješenjem koje donosi ministar.

Odjeljak C – Praćenje rada policijskog komesara

Član 44.
(Praćenje rada policijskog komesara)

- (1) Nezavisni odbor se sastaje najmanje jednom mjesečno.
- (2) Policijski komesar dužan je redovno izvještavati Nezavisni odbor o svom radu i staviti mu na raspolaganje sve tražene podatke i dokumentaciju iz nadležnosti rada Nezavisnog odbora.
- (3) Nezavisni odbor sačinjava detaljan izvještaj o radu policijskog komesara svaka tri mjeseca, koji dostavlja Skupštini Kantona.

Član 45.
(Godišnja ocjena rada policijskog komesara)

- (1) Nezavisni odbor, donosi prijedlog godišnje pismene ocjene rada policijskog komesara prema ocjenama: "nezadovoljava" ili "zadovoljava". Prijedlog ocjene se uz obrazloženje dostavlja Ministru, Vladi Kantona i policijskom komesaru za informaciju.
- (2) Ministar i policijski komesar imaju pravo dati svoje pisano izjašnjenje o prijedlogu ocjene iz stava (1) ovog člana koje ministar dostavlja Vladi Kantona Sarajevo na odlučivanje.
- (3) Na osnovu prijedloga ocjena Nezavisnog odbora i izjašnjenja ministra i policijskog komesara, Vlada Kantona donosi Odluku o godišnjoj ocjeni rada policijskog komesara.
- (4) Policijski komesar može izjaviti prigovor Vladi Kantona, na odluku iz stava (3) ovog člana, u roku od 8 dana od dana dostavljanja odluke.
- (5) Odluka Vlade Kantona po prigovoru je konačna.

Član 46.
(Pristup Nezavisnog odbora informacijama)

- (1) U svrhu ocjene rada policijskog komesara, Nezavisni odbor uzima u obzir dokumente relevantne za rad policijskog komesara i poziva policijskog komesara da prisustvuje sjednici Odbora jednom u tri mjeseca. Nezavisni odbor zahtijeva od Ministarstva i njegovih organizacionih jedinica pristup svim informacijama za koje smatra da su neophodne za ocjenu rada policijskog komesara.
- (2) Nezavisni odbor ima pravo pristupa informacijama u skladu sa odredbama Zakona o zaštiti ličnih podataka i Zakona o zaštiti tajnih podataka.

Odjeljak D - Postupak smjene policijskog komesara

Član 47.

(Uvjeti za smjenu policijskog komesara)

- (1) Nezavisni odbor podnosi prijedlog za smjenu policijskog komesara Vladi Kantona u sljedećim slučajevima:
 - a) na osobni zahtjev policijskog komesara,
 - b) ukoliko trajno nije u mogućnosti obavljati svoje dužnosti i odgovornosti,
 - c) ukoliko ne provodi mjere nadzora nad Upravom policije ili mjere nadzora nad primjenom policijskih ovlaštenja,
 - d) ukoliko je konačnom odlukom utvrđena disciplinska odgovornost policijskog komesara i sankcija prestanak radnog odnosa;
 - e) ukoliko je njegov rad ocjenjen godišnjom ocjenom "nezadovoljava";
 - f) ukoliko je izrečena pravomoćna kazna zatvora za krivično djelo ili
 - g) ukoliko su ispunjeni uvjeti za prestanak radnog odnosa propisani Zakonom o policijskim službenicima Kantona Sarajevo.

Član 48.

(Pokretanje i odluka o smjeni policijskog komesara)

- (1) Ukoliko postoji jedan ili više razloga / uslova za pokretanje postupka smjene iz člana 47. ovog Zakona, Nezavisni odbor će posredstvom ministra dostaviti prijedlog za smjenu policijskog komesara Vladi Kantona.
- (2) Vlada Kantona je dužna u roku od 30 dana od dana prijema prijedloga Nezavisnog odbora, razmotriti dostavljeni prijedlog i donijeti odluku o smjeni ili o odbijanju prijedloga iz stava (1) ovog člana.

Član 49.

(Inicijativa Ministra za smjenu policijskog komesara)

- (1) Ministar može podnijeti inicijativu za smjenu policijskog komesara.
- (2) Inicijativa iz stava (1) ovog člana podnosi se u slučaju kada se raspolaže dokazima da policijski komesar ne obavlja pravilno poslove iz člana 22. stav (3) tačka b) i r) ovog zakona.
- (3) Inicijativu iz stava (1) ovog člana ministar dostavlja Nezavisnom odboru na razmatranje i davanje mišljenja.
- (4) Nezavisni odbor dužan je svoje mišljenje dati u roku od 15 dana od dana prijema inicijative.
- (5) Ministar će svoju inicijativu za smjenu policijskog komesara i mišljenje Nezavisnog odbora dostaviti Vladi Kantona na razmatranje i odlučivanje, koja je dužna u roku od 30 dana od dana prijema inicijative i mišljenja iz stava (3) ovog člana, razmotriti i donijeti konačnu odluku.

POGLAVLJE VII – DISCIPLINSKA ODGOVORNOST POLICIJSKOG KOMESARA

Član 50.

(Disciplinska odgovornost policijskog komesara)

- (1) Policijski komesar je disciplinski odgovoran za povrede službene dužnosti utvrđene u članu 51. ovog zakona koje nastaju kao rezultat njegove krivice.
- (2) Krivična odgovornost za krivično djelo i prekršajna odgovornost za prekršaj ne isključuje disciplinsku odgovornost policijskog komesara ako počinjeno krivično djelo ili prekršaj istovremeno predstavlja i povredu službene dužnosti iz člana 51. ovog zakona.
- (3) Oslobađanje od krivične odgovornosti ili prekršajne odgovornosti ne podrazumjeva istovremeno i oslobađanje od disciplinske odgovornosti policijskog komesara.

Član 51.

(Povrede službenih dužnosti policijskog komesara)

- (1) Policijski komesar disciplinski odgovara za sljedeće povrede službenih dužnosti:
 - a) neizvršavanje ili nesavjesno ili nepravovremeno izvršavanje službenih zadataka predviđenih ovim i drugim zakonima i podzakonskim propisima;
 - b) zloupotreba službenog položaja;
 - c) nekorektno i neprofesionalno ponašanje prema policijskim službenicima, državnim službenicima ili namještenicima Uprave policije ili strankama;
 - d) davanje netačnih podataka koji utiču na donošenje odluka nadležnih organa;
 - e) odbijanje izvršenja zakonitih naredbi nadležnih organa;
 - f) spriječavanje građana ili pravnih lica u ostvarivanju njihovih prava pri podnošenju zahtjeva, žalbi, pritužbi, molbi i drugih podnesaka ili neodlučivanje po tim podnescima u zakonskom roku;
 - g) prikrivanje činjenica o načinu izvršenja službenih zadataka;
 - h) spriječavanje, izbjegavanje, ometanje ili na drugi način odgađanje provođenja disciplinskog postupka protiv državnog službenika, policijskog službenika i namještenika;
 - i) nepoduzimanje ili nedovoljno poduzimanje mjera iz svoje nadležnosti;
 - j) davanje i otkrivanje podataka koji su određeni stepenom tajnosti u skladu sa Zakonom o zaštiti podataka;
 - k) provođenje aktivnosti koje nisu u skladu sa interesima ministarstva i Uprave policije, odnosno kojima se narušava ugled ministarstva i Uprave policije;
 - l) učestvovanje u političkim aktivnostima i obavljanje drugih političkih aktivnosti koje nisu u skladu sa službenom dužnošću;
 - m) protivpravno pribavljanje osobne ili imovinske koristi za sebe ili druge u vezi sa radom;
 - n) izdavanje naređenja čije bi izvršenje predstavljalo krivično djelo;
 - nj) diskriminacija pri vršenju dužnosti na osnovu: rase, boje kože, spola, jezika, religije, političkog ili drugog opredjeljenja, nacionalnog ili socijalnog porijekla ili po bilo kojem drugom osnovu.

Član 52.
(Rješenje o pokretanju disciplinskog postupka)

- (1) Rješenje o pokretanju disciplinskog postupka donosi ministar u slučaju postojanja osnova sumnje da je policijski komesar počinio povredu službene dužnosti iz člana 51. ovog zakona.
- (2) Inicijativu za pokretanje disciplinskog postupka mogu podnijeti Nezavisni odbor, radna tijela Skupštine Kantona nadležna za sigurnost, drugi organi i ministar na vlastiti prijedlog.
- (3) U rješenju iz stava (1) ovog člana odredit će se osoba koja će zastupati rješenje o pokretanju disciplinskog postupka pred Nezavisnim odborom.
- (4) Disciplinski postupak je javan.

Član 53.
(Vođenje disciplinskog postupka protiv policijskog komesara)

- (1) Prvostepeni disciplinski postupak protiv policijskog komesara vodi i rješenje o izricanju disciplinske sankcije donosi Nezavisni odbor.
- (2) Postupak iz stava (1) ovog člana vodi se prema odredbama člana od 54. do 56. ovog zakona.

Član 54.
(Drugostepeni disciplinski postupak)

- (1) Protiv prvostepenog rješenja iz člana 53. ovog zakona može se izjaviti žalba u roku od 15 dana od dana prijema rješenja Drugostepenoj disciplinskoj komisiji iz stava (2) ovog člana.
- (2) Drugostepeni disciplinski postupak vodi Drugostepena disciplinska komisija koju ad hoc imenuje radno tijelo Skupštine Kantona nadležno za sigurnost.
- (3) Drugostepena disciplinska komisija ima 5 članova od kojih najmanje 2 člana moraju biti diplomirani pravnici.
- (4) U Drugostepenu disciplinsku komisiju ne mogu biti imenovani članovi Nezavisnog odbora.
- (5) Rješenje Drugostepene disciplinske komisije doneseno po žalbi je konačno i protiv njega se može podnijeti tužba kod nadležnog suda u roku od 30 dana od dana prijema rješenja.

Član 55.
(Disciplinske sankcije)

- (1) Za povrede službene dužnosti iz člana 51. ovog zakona mogu se izreći sljedeće disciplinske sankcije:
 - a) pismena opomena;
 - b) novčana kazna u iznosu do 40% osnovne plaće na period do šest mjeseci
 - c) prestanak radnog odnosa
- (2) Pismena opomena se izriče za povrede iz člana 51. tačka h) ovog zakona.
- (3) Disciplinska sankcija prestanak radnog odnosa izriče se u slučaju kada se ocijeni da su izvršene povrede službene dužnosti izazvale teže posljedice za sigurnost u kantonu i da je prestanak radnog odnosa jedina odgovarajuća disciplinska sankcija za nastale posljedice.

Član 56.
(Ovlaštenje za donošenje propisa)

Nezavisni odbor će uz saglasnost radnih tijela Skupštine Kantona nadležnih za sigurnost donijeti pravilnik kojim će bliže urediti funkcionisanje Nezavisnog odbora, disciplinski postupak, javnost rada, pravo na odbranu, saslušanje svjedoka i izricanje disciplinskih sankcija iz člana 55. ovog zakona, te druga pitanja koja se odnose na disciplinsku odgovornost policijskog komesara.

Član 57.
(Obaveza saradnje)

Sve organizacione jedinice Ministarstva i Uprave policije sarađuju sa organima disciplinskog postupka, uključujući pristup relevantnim podacima i osoblju.

POGLAVLJE VI – ODBOR ZA ŽALBE JAVNOSTI

Član 58.
(Sastav Odbora za žalbe javnosti)

- (1) Odbor za žalbe javnosti (u daljem tekstu: Odbor) se osniva kao nezavisno tijelo Skupštine kantona koje čine tri člana, od kojih je jedan član državni službenik kantonalnih organa uprave, a dva člana predstavnici građana od kojih je jedan predsjedavajući Odbora.
- (2) Odbor imenuje Skupština Kantona na prijedlog Komisije za izbor i imenovanja Skupštine Kantona.
- (3) Sastav Odbora odražavat će nacionalnu zastupljenost prema posljednjem važećem popisu stanovništva u Bosni i Hercegovini, te će se voditi računa o spolnoj zastupljenosti.
- (4) Administrativnu i tehničku podršku u radu Odbora pruža Skupština Kantona koja osigurava i naknadu za rad članova Odbora.

Član 59.
(Rad Odbora)

- (1) Rad Odbora ima za cilj osigurati objektivno i nepristrasno vođenje postupka u vezi sa izjavljenim žalbama na rad i ponašanje policijskih službenika, čime osigurava zaštitu ljudskih prava i sloboda.
- (2) Pod žalbama iz stava (1) ovog člana podrazumjevaju se zahtjevi, žalbe, pritužbe ili drugi podnesci koji se odnose na nepravilan rad policijskih službenika.

Član 60.
(Poslovi iz nadležnosti Odbora)

- (1) Odbor je nadležan za obavljanje sljedećih poslova:
 - a) prima, razmatra, procjenjuje i prosljeđuje žalbe na rad policijskih službenika Uprave policije izjavljenih od građana, pravnih lica i drugih subjekata;
 - b) prati, nadzire predmete i interni postupak koje provodi Jedinica za profesionalne standarde i obavještava građane o ishodu postupka;

- c) prati i nadgleda izvršenje disciplinskih sankcija izrečenih od nadležnih disciplinskih tijela i provođenje tih disciplinskih sankcija kako bi se osigurala pravičnost i dosljednost, kao i svrha kažnjavanja;
 - d) na osnovu izvještaja Jedinice za profesionalne standarde vodi evidencije i baze podataka o žalbama građana i rezultatima istrage na osnovu kojih je pokrenut disciplinski, prekršajni ili krivični postupak;
 - e) prati i nadgleda je li Jedinica za profesionalne standarde dostavila izvještaj nadležnom tužilaštvu u slučaju kada postoji osnovana sumnja da se radi o krivičnom djelu;
 - f) zahtjeva pokretanje disciplinskog postupka protiv istražitelja Jedinice za profesionalne standarde ili odgovornog voditelja zbog zloupotrebe ili zapostavljanja postupka;
 - g) vrši nadzor nad ostvarivanjem nezavisnosti u radu Jedinice za profesionalne standarde koji se odnosi na pokrenuti interni postupak;
 - h) dostavlja Nezavisnom odboru pritužbe koje se odnose na rad policijskog komesara;
 - i) priprema i podnosi godišnji izvještaj o svom radu Skupštini Kantona;
 - j) obavlja javnost o svom radu;
 - k) donosi poslovnik o svom radu
 - l) obavlja i druge poslove propisane zakonom i podzakonskim propisima.
- (2) Ako se žalba ili pritužba odnosi na državnog službenika ili namještenika ministarstva ili Uprave policije, Odbor proslijeđuje žalbu ili pritužbu ministru ili policijskom komesaru u roku od 15 dana od dana prijema žalbe odnosno pritužbe.

Član 61.

(Mišljenje Jedinice za profesionalne standarde)

Odbor za žalbe može na zahtjev Jedinice za profesionalne standarde dostaviti svoje mišljenje u konkretnom slučaju, a u skladu sa svojim nadležnostima iz člana 60. ovog zakona.

Član 62.

(Dostavljanje žalbe Jedinici za profesionalne standarde)

Odbor će žalbu ili pritužbu izjavljenu na rad policijskog službenika dostaviti Jedinici za profesionalne standarde u roku od 15 dana od dana prijema žalbe, koja će obavijestiti Odbor o svim poduzetim radnjama po dostavljenoj žalbi ili pritužbi nakon provedenog internog postupka.

Član 63.

(Mandat članova Odbora)

- (1) Odbor se imenuje na mandatni period od četiri godine.
- (2) Članovi odbora iz stava (1) ovog člana mogu biti ponovno izabrani u Odbor, samo jednom uzastopno.
- (3) Najmanje šest mjeseci prije isteka mandata pokrenut će se procedura za izbor novog Odbora.

Član 64.

(Uvjeti za imenovanje i razrješenje članova Odbora)

- (1) Članovi odbora biraju se iz reda istaknutih stručnjaka iz oblasti pravnih ili drugih društvenih nauka, sa najmanje pet godina radnog staža nakon sticanja visoke školske spremne, a predsjedavajući odbora mora imati najmanje deset godina radnog iskustva na pravnim poslovima.
- (2) Uvjeti za imenovanje i razrješenje članova odbora te postupak njihovog imenovanja i razrješenja bliže će se urediti pravilnikom koji donosi ministar uz saglasnost Komisije za izbor i imenovanja Skupštine Kantona.

POGLAVLJE VIII - UPOSLENICI MINISTARSTVA, STRUČNO OBRAZOVANJE I USAVRŠAVANJE I NAGRAĐIVANJE

Član 65.

(Uposlenici Ministarstva i Uprave policije)

- (1) Poslove i zadatke iz nadležnosti Ministarstva i Uprave policije vrše policijski službenici, državni službenici i namještenici.
- (2) Policijski službenici su uposlenici Ministarstva ovlašteni da primjenjuju policijske ovlasti, propisane Zakonom o policijskim službenicima Kantona Sarajevo i postupaju kao ovlaštena službena lica po posebnim propisima. Radno pravni status policijskih službenika propisan je Zakonom o policijskim službenicima Kantona Sarajevo.
- (3) Državni službenici su uposlenici Ministarstva i Uprave policije čiji je radno pravni status propisan Zakonom o državnoj službi u FBiH.
- (4) Namještenici su uposlenici Ministarstva i Uprave policije čiji je radno pravni status propisan Zakonom o namještenicima u organima državne službe u FBiH.
- (5) Radna mjesta policijskih službenika, državnih službenika i namještenika utvrđuju se Pravilnikom o unutrašnjoj organizaciji.

Član 66.

(Dodatak uz platu)

- (1) Za određena radna mjesta državnih službenika i namještenika u Upravi policije na kojima se obavljaju poslovi pod posebnim uvjetima i odgovornostima sredstva za plaće stiču se pod istim uvjetima koji važe za državne službenike i namještenike kantonalnih organa uprave uvećana do 30% osnovne plaće.
- (2) Vlada Kantona na prijedlog ministra i policijskog komesara utvrđuje radna mjesta iz stava (1) ovog člana

Član 67.

(Stručno obrazovanje i usavršavanje)

- (1) Svi uposlenici Ministarstva su obavezni da se stručno obrazuju i usavršavaju.
- (2) Sredstva za stručno osposobljavanje i usavršavanje iz stava (1) ovog člana će biti predviđena u Budžetu Kantona, na budžetskoj poziciji Ministarstva i Uprave policije.

Član 68.
(Pripravnici)

Pripravnici se primaju u Ministarstvo prema postupku propisanom zakonima koji regulišu radne odnose državnih službenika i namještenika.

Član 69.
(Odabir kandidata)

- (1) Uprava policije odabire kandidate za pohađanje obuke za policijske službenike u skladu sa potrebama Uprave policije i po postupku utvrđenom u skladu sa Zakonom o policijskim službenicima Kantona Sarajevo.
- (2) Nakon konačnog odabira kandidata i zaključivanja ugovora, kandidati stiču status kadeta.
- (3) Obuka kadeta za potrebe Uprave policije se reguliše posebnim ugovorom između Uprave policije i institucije u kojoj se vrši osnovna policijska obuka.

Član 70.
(Međusobne obaveze kadeta i Uprave policije)

- (1) Međusobne obaveze između kadeta i Uprave policije se regulišu posebnim ugovorom.
- (2) Za vrijeme obuke kadeti će imati obezbijeđen smještaj, hranu, kompletnu uniformu, udžbenike, zdravstveno i invalidsko osiguranje ako nemaju takvo osiguranje po drugoj osnovi, i mjesečna primanja dovoljna da pokriju osnovne lične troškove.
- (3) Sredstva za školovanje kadeta u instituciji koja obezbjeđuje osnovnu policijsku obuku osiguravaju se u Budžetu Kantona, na budžetskoj poziciji Uprave policije.

Član 71.
(Nagrade)

- (1) Organizacionim jedinicama i uposlenicima Ministarstva i Uprave policije mogu biti dodjeljena priznanja, pohvale i druge nagrade za postignuti uspjeh u vršenju njihovih poslova.
- (2) Priznanja, pohvale i druge nagrade iz stava (1) ovog člana za organizacione jedinice i uposlenike Ministarstva, dodjeljuju se na osnovu rješenja ministra, a za organizacione jedinice i uposlenike Uprave policije na osnovu rješenja policijskoga komesara.
- (3) Ministar donosi Pravilnik o priznanjima, pohvalama i nagradama koje se dodjeljuju organizacionim jedinicama i uposlenicima Ministarstva i Uprave policije.

POGLAVLJE IX – MEĐUSOBNI ODNOSI I SARADNJA IZMEĐU MINISTARSTVA SA MINISTARSTVOM SIGURNOSTI, DRUGIH MINISTARSTAVA UNUTRAŠNJIH POSLOVA I POLICIJSKIM TIJELIMA I ORGANIMA UPRAVE U BIH

Član 72.

(Principi saradnje)

Međusobni odnosi Ministarstva sa organima uprave na svim nivoima vlasti u Bosni i Hercegovini zasnivaju se na uzajamnoj saradnji, kontaktima, sporazumima, protokolima, ugovorima, razmjeni informacija od zajedničkog interesa u skladu sa zakonom.

Odjeljak A. – Međusobni odnosi i saradnja unutar Federacije Bosne i Hercegovine

Član 73.

(Saradnja sa drugim ministarstvima unutrašnjih poslova kantona i Federalnim ministarstvom unutrašnjih poslova)

Ministarstvo sarađuje sa Federalnim ministarstvom unutrašnjih poslova i ministarstvima unutrašnjih poslova drugih Kantona u cilju zajedničkog unapređivanja rada, usaglašavanja planova rada, poduzimanja zajedničkih aktivnosti i sigurnosnih mjera od zajedničkog interesa.

Član 74.

(Zadaci povjereni od strane Federalnog ministarstva unutrašnjih poslova i pružanje pomoći ministarstvima unutrašnjih poslova drugih kantona)

- (1) Federalno ministarstvo unutrašnjih poslova može povjeriti Ministarstvu poslove iz svoje nadležnosti u skladu sa Zakonom o unutrašnjim poslovima Federacije Bosne i Hercegovine.
- (2) Ministarstvo izvršava povjerene zadatke od strane Federalnog ministarstva.
- (3) Ministarstvo pruža pomoć ministarstvima unutrašnjih poslova drugih kantona kad oni to zatraže.
- (4) U slučaju da Ministarstvo poduzme aktivnosti navedene u stavu (1) i (2) ovog člana, Federalno ministarstvo ili ministarstvo unutrašnjih poslova drugog kantona snosi dodatne troškove izvršenja tih zadataka. Detalji u vezi sa dodatnim troškovima se dogovaraju na uzajamnoj osnovi i po potrebi, a što se reguliše posebnim ugovorom.

Odjeljak B. - Međusobni odnosi i saradnja sa Ministarstvom sigurnosti, ostalim ministarstvima unutrašnjih poslova, policijskim organima i organima uprave u BiH

Član 75.

(Saradnja sa drugim organima, ministarstvima unutrašnjih poslova i ostalim policijskim agencijama u Bosni i Hercegovini)

Ministarstvo sarađuje sa Ministarstvom sigurnosti BiH, kao i sa Državnom agencijom za istrage i zaštitu, Graničnom policijom, Direkcijom za koordinaciju policijskih tijela u Bosni i Hercegovini, Agencijom za policijsku podršku, Ministarstvom unutrašnjih poslova Republike Srpske, Policijom Distrikta Brčko, putem kontakata, sporazuma, protokola i razmjene informacija o pitanjima od zajedničkog interesa.

Član 76.

(Pružanje pomoći policijskim organima u Bosni i Hercegovini)

- (1) U okviru svoje nadležnosti, Ministarstvo je dužno sarađivati sa i pružiti pomoć policijskim organima iz člana 75. ovog Zakona, na njihov zahtjev.
- (2) U slučaju da Ministarstvo poduzme aktivnosti iz stava (1) ovog člana, ministarstva i ostali policijski organi snose dodatne troškove izvršenja tih zadataka. Detalji u vezi sa dodatnim troškovima se dogovaraju na uzajamnoj osnovi i po potrebi u skladu sa posebnim ugovorom.

Član 77.

(Zajedničko korištenje sredstava Uprave policije i ostalih policijskih organa)

- (1) Uprava policije može zajednički koristiti sredstva policijskih organa i organa uprave Bosni i Hercegovini, Federalne uprave policije, Uprava policije drugih kantona, Ministarstva unutrašnjih poslova Republike Srpske, Policije Brčko distrikta za vršenje poslova u vezi sa stručnim osposobljavanjem i usavršavanjem policijskih službenika, naučno-istraživačkim radom relevantnim za potrebe policije, razvoja kompleksnih kriminalističkih i tehničkih stručnih procjena, obezbjeđenjem policijske opreme, sistema informacionih tehnologija i komunikacijskih sistema, naoružanja i drugih sličnih sredstva, kao i u vezi drugih zadataka iz svoje nadležnosti.
- (2) U skladu sa stavom (1) ovog člana policijski organi mogu udruživati finansijska i druga sredstva. Detalji o zajedničkim finansijskim i drugim sredstvima se dogovaraju na uzajamnoj osnovi i po potrebi što se reguliše posebnim ugovorom.

Odjeljak C. - Međusobni odnosi i saradnja u krivičnim stvarima Uprave policije sa drugim policijskim organima i agencijama za provođenje zakona u Bosni i Hercegovini

Član 78.

(Saradnja u krivičnim stvarima)

Uprava policije uspostavlja službenu saradnju u krivičnim stvarima sa drugim policijskim organima i agencijama za provođenje zakona u Bosni i Hercegovini, u skladu sa Zakonom o pravnoj pomoći i službenoj saradnji u krivičnim stvarima između Federacije, RS i Brčko Distrikta i drugim zakonima i propisima.

Član 79.

(Razmjena informacija i prikupljanje podataka)

U ostvarivanju saradnje iz člana 76. ovog Zakona, uspostavlja se kontinuirana razmjena podataka i informacija između Uprave policije, Direkcije za koordinaciju policijskih tijela Bosne i Hercegovine, Državne agencije za istrage i zaštitu, Granične policije, Federalne uprave policije, drugih kantonalnih uprava policije, Ministarstva unutrašnjih poslova Republike Srpske i Policije Brčko Distrikta kao i sa drugim nadležnim tijelima.

Član 80.
(Ovlasti policijskih službenika na teritoriji Kantona)

Policijski službenici Direkcije za koordinaciju policijskih tijela u Bosni i Hercegovini, Državne agencije za istrage i zaštitu, Granične policije i Federalne uprave policije, kod vršenja poslova iz svoje nadležnosti, imaju iste ovlasti na teritoriji Kantona, kao i policijski službenici Uprave policije.

Član 81.
(Vršenje poslova izvan teritorije Kantona)

Uprava policije može direktno sa drugim kantonalnim upravama policije ili sa Ministarstvom unutrašnjih poslova Republike Srpske i sa Policijom Brčko Distrikta utvrditi uvjete pod kojima policijski službenici mogu vršiti određene zadatke ili poslove na području drugog policijskog organa, te uvjete pod kojim policijski službenici tih organa mogu vršiti određene poslove i zadatke na području Kantona.

Član 82.
(Krivična djela u nadležnosti drugih policijskih organa)

- (1) U slučaju da vršeći zadatke iz svoje nadležnosti, otkrije da se priprema izvršenje ili je izvršeno krivično djelo u nadležnosti drugih policijskih organa u Bosni i Hercegovini, Uprava policije poduzima neophodne mjere i aktivnosti na sprečavanju izvršenja tog krivičnog djela ili pronalaženju i hvatanju učinioca krivičnog djela.
- (2) Nakon poduzimanja mjera i aktivnosti iz stava (1) ovog člana, Uprava policije će odmah obavijestiti policijski organ nadležan za ta krivična djela.

Član 83.
(Razmjena informacija u određenom slučaju)

- (1) Uprava policije razmjenjuje informacije sa drugim policijskim organima u BiH ako oni smatraju takvu informaciju neophodnom ili ako bi korištenje te informacije pomoglo istražni postupak ili rad policije.
- (2) Razmjena informacija se vrši u skladu sa Zakonom o zaštiti tajnih podataka i drugim zakonima i propisima.

Član 84.
(Razmjena podataka)

- (1) Ministarstvo i Uprava policije mogu razmjenjivati podatke:
 - a) s drugim policijskim i ostalim nadležnim organima;
 - b) s nadležnim organima u svrhu uspostave i funkcionisanja baza podataka koje će koristiti svi policijski i nadležni organi u Bosni i Hercegovini;
 - c) sa nadležnim organima u svrhu uspostave i funkcionisanja sistema razmjene podataka sa drugim policijskim i ostalim nadležnim organima u Bosni i Hercegovini;

- d) u druge svrhe u skladu sa zakonima i propisima;
- (2) Podaci iz stava (1) ovog člana se odnose na poslove policijskih organa i Ministarstva i drugih nadležnih organa u Bosni i Hercegovini.

Član 85.

(Pomoć u vanrednim situacijama)

U slučaju prirodnih nepogoda, epidemija, ili drugih vanrednih situacija, Ministarstvo može zatražiti i pružiti pomoć u pogledu resursa, opreme i ljudstva drugim kantonalnim ministarstvima unutrašnjih poslova, Federalnom ministarstvu unutrašnjih poslova, Ministarstvu unutrašnjih poslova Republike Srpske, Policiji Brčko Distrikta, Državnoj agenciji za istrage i zaštitu i Graničnoj policiji.

POGLAVLJE X – PRELAZNE I ZAVRŠNE ODREDBE

Član 86.

(Podzakonski propisi koje donosi Vlada Kantona)

U roku od tri mjeseca od dana stupanja na snagu ovog Zakona, Vlada Kantona će donijeti slijedeće podzakonske propise:

- a) Uredbu o osiguranju određenih ličnosti i objekata u Kantonu (član 11.)
- b) Uredbu o radnim mjestima koje obavljaju državni službenici i namještenici pod posebnim uslovima rada iz člana 66. ovog zakona.

Član 87.

Podzakonski propisi koje donosi ministar

- (1) U roku od tri mjeseca od dana stupanja na snagu ovog Zakona, ministar će na prijedlog policijskog komesara donijeti slijedeće podzakonske propise:
 - a) Instrukciju o pružanju pomoći drugim organima (član 12.)
 - b) Pravilnik o pohvalama, priznanjima i nagradama uposlenika Ministarstva i Uprave policije (član 71.)
- (2) U roku od šest mjeseci od dana stupanja na snagu ovog Zakona ministar će, uz saglasnost Vlade Kantona, donijeti Pravilnik o unutrašnjoj organizaciji Ministarstva (član 15.).

Član 88.

(Prelazne odredbe o imenovanju policijskog komesara, Nezavisnog odbora i Odbora za žalbe javnosti)

Policijski komesar, članovi Nezavisnog odbora i Odbora za žalbe javnosti (Ured za pritužbe javnosti), imenovani na tu poziciju u skladu sa zakonima i drugim propisima koji su bili na snazi prije stupanja na snagu ovog Zakona, ostaju na toj poziciji do isteka svog mandata.

Član 89.
(Postavljenje i raspored državnih službenika i namještenika)

Ministar i policijski komesar su dužni u skladu sa provedbenim propisom iz člana 87. stav (2) ovog zakona, izvršiti postavljenje i raspored državnih službenika i namještenika u skladu sa Zakonom o državnoj službi u FBiH i Zakonom o namještenicima u organima državne službe u FBiH, iz ukinutih organizacionih jedinica.

Član 90.
(Raspodjela sredstava)

U roku od tri mjeseca od dana stupanja na snagu ovog Zakona ministar i policijski komesar će donijeti odluku o diobnom bilansu opreme i sitnog inventara Ministarstva i Uprave policije.

Član 91.
(Prestanak važenja ranijeg zakona)

- (1) Stupanjem na snagu ovog Zakona, prestaje da važi Zakon o unutrašnjim poslovima Kantona Sarajevo („Službene novine Kantona Sarajevo“, broj: 22/00 – Prečišćeni tekst, 15/02, 18/02 i 28/02).
- (2) Podzakonski akti, doneseni na osnovu Zakona iz stava (1) ovog člana, ostaju na snazi do donošenja novih podzakonskih akata.

Član 92.
(Stupanje na snagu)

Ovaj Zakon stupa na snagu osmog dana od dana objavljivanja u „Službenim novinama Kantona Sarajevo“.

PREDSJEDAVAJUĆI
SKUPŠTINE KANTONA SARAJEVO

Broj: 01-02-16557/15

Sejo Bukva, s.r.

Sarajevo, 27.05.2015.godine

OBRAZLOŽENJE NACRTA ZAKONA O UNUTRAŠNJIM POSLOVIMA KANTONA SARAJEVO

I USTAVNI OSNOV ZA DONOŠENJE ZAKONA

Ustavni temelj za donošenje ovog zakona sadržan je u odredbama člana 12. stav (1), tačka a) i 18. tačka b) Ustava Kantona Sarajevo („Službene novine Kantona Sarajevo“, broj: 1/96, 2/96, 3/96, 16/97, 14/00, 4/01, 28/04 i 06/13).

II RAZLOZI ZA DONOŠENJE ZAKONA

- (1) Obaveza kantona da usklade Zakon o unutrašnjim poslovima sa Zakonom o unutrašnjim poslovima Federacije BiH kao i drugim propisima:
 - a) Postoji hitna potreba da se sadašnji Zakon o unutrašnjim poslovima izmijeni kako bi se uklopio u nove okolnosti i postojeći zakonodavni okvir.
 - b) Donošenjem Zakona o policijskim službenicima Kantona Sarajevo kojim su uređene policijske ovlasti i radni odnosi policijskih službenika određeni broj odredaba Zakona o unutrašnjim poslovima koje su ugrađene u novi Zakon o policijskim službenicima, mora biti brisan ili odredbe izmjenjene.
 - c) Pored Zakona o policijskim službenicima Kantona Sarajevo i drugi zakoni su usvojeni ili su donesene izmjene i dopune na postojeće zakone (između ostalih, Zakon o kretanju i boravku stranaca BiH, Zakon o agencijama za zaštitu lica i imovine, Zakon o osnovama bezbjednosti saobraćaja, itd.). I ovi zakoni također traže izmjene u Zakonu o unutrašnjim poslovima.
 - d) Kao posljedica pomenutog u poglavljima (2) i (3) može se zaključiti da Kanton Sarajevo ima zakonsku obavezu da Zakon o unutrašnjim poslovima uskladi sa svim navedenim propisima kao i radi harmonizacije propisa u oblasti policijskih struktura u BiH.
- (2) Nedostaci važećeg Zakona o unutrašnjim poslovima
 - a) Provođenje važećeg Zakona o unutrašnjim poslovima je pokazalo da isti više nije dovoljan da bi se zadovoljile potrebe Ministarstva unutrašnjih poslova i Uprave policije. Naprimjer, važeći Zakon o unutrašnjim poslovima jasno ne reguliše nadležnosti ministra prema policijskom komesaru, produženje mandata Nezavisnog odbora, disciplinsku odgovornost policijskog komesara itd.
 - b) Svi ovi nedostaci utiču na nesmetano provođenje Zakona, a time i na funkcionisanje Ministarstva unutrašnjih poslova i Uprave policije. Profesionalni odnos kreatora politike sa policijskim organom treba biti reguliran kao institucionalno rješenje, a ne zasnovan na ličnom razumjevanju.
- (3) Potrebe za usklađivanjem zakona u Federaciji BiH, Republici Srpskoj i Bosni i Hercegovini
- (4) Projekat usklađivanja kantonalnih zakona o unutrašnjim poslovima predstavlja jedan od koraka koji vode ka usklađenom policijskom zakonodavstvu u BiH.
- (5) Kako je zakonski okvir koji uređuje radne odnose policijskih službenika usklađen na nivou Bosne i Hercegovine, mora se pristupiti na dosljedan način i legislativi kojom se uređuje struktura ministarstva unutrašnjih poslova i policijskih organa na kantonalnom nivou. Identična procedura se vodi i u Federalnom MUP-u.
- (6) Ukoliko slični zakoni ne budu usklađeni, primjenjivaće se različita pravila od kantona do kantona za policijske službenike i institucije u Federaciji, što će opet stvoriti dodatne i nepotrebne teškoće tim institucijama kao i različite standarde.
- (7) Princip usklađivanja u cilju harmonizacije trebao bi biti osnova za izradu principa nacrtu Zakona o unutrašnjim poslovima.
- (8) Potreba da se na decidan i jasan nači definiše postupak izbora i imenovanja policijskog komesara
- (9) Trenutno je Nezavisni odbor za izbor i reviziju glavno tijelo u postupku izbora policijskog komesara.

Odluke Nezavisnog odbora za izbor i reviziju su obavezujuće za Vladu i ministra koji ne mogu imenovati policijskog komesara, osim ako nije predložen od strane Nezavisnog odbora za izbor i reviziju.

- (10) Potreba da se odrede i povećaju nadležnosti ministra i policijskog komesara
- (11) Postoji potreba za preciznijim regulisanjem nadležnosti ministra kao osobe sa najvećim ovlaštenjima kod utvrđivanja bezbjedonosnih politika vlade. Ulogu ministra da nadzire rad policijskog komesara i odobrava planove bezbjedonosne politike treba striktno regulisati. U zakonu također treba posebno regulisati ulogu policijskog komesara.
- (12) Neophodnost donošenja rješenja za pitanja “operativne saradnje”
- (13) Zbog fragmentirane strukture policijskih organa vrlo je važno da policijski organi imaju potrebnu pravnu osnovu za saradnju i koordinaciju u radu sa drugim policijskim organima u Federaciji i BiH.
- (14) Potreba uspostavljanja uslova za samoodrživost policijskih organa

U smislu najboljih praksi Evropske Unije, preporučuje se da kantonalni policijski organi ne ostanu integrisani unutar Ministarstva unutrašnjih poslova kao što je to slučaj danas. Kako bi dalje poboljšali efikasnost Ministarstva unutrašnjih poslova, nadležne međunarodne organizacije i OHR predlažu podjelu dvaju glavnih funkcija Ministarstva, dajući operativnoj policiji status Uprave policije sa odvojenim budžetom. Osnovni cilj donošenja novog zakona je osiguravanje budžetske i pravne nezavisnosti Uprave policije, a s ciljem zakonske zaštite Uprave policije od neprimjerenog uplitanja politike.

Poglavlje I uređuje predmet zakona, principe policijske službe i uvodi novi pravni status Uprave policije koja će, umjesto dosadašnje osnovne organizacione jedinice, postati uprava unutar Ministarstva, koja ima status policijskog organa i budžetskog korisnika.

Poglavlje II uređuje nadležnosti kantona u vezi unutrašnjih poslova, zajedničke nadležnosti, sukob nadležnosti, te način na koji će policija pružati pomoć drugim organima i pravnim licima.

Poglavlje III uređuje strukturu Ministarstva i njegovih organizacionih jedinica i Upravu policije (unutar Ministarstva unutrašnjih poslova) i njihove naprijed definisane nadležnosti.

Poglavlje IV definiše Ministra i policijskog komesara, nadležnosti, njihovu zamjenu i rukovodno područje rada.

U ovom poglavlju uveden je novi odjeljak kako bi se regulisala procedura odobrenja i realizacije budžeta. Predložena rješenja balansiraju ovlasti ministra i policijskog komesara u postupku predlaganja budžeta i njegove realizacije. Predloženi nacrt preciznije definiše rukovodne odgovornosti policijskog komesara uključujući i prava i odgovornost u pogledu korištenja budžetskih sredstava uključujući i odgovornost za javne nabavke.

Poglavlje V ima za cilj da bolje definiše rad Nezavisnog odbora kod izbora i ocjene rada policijskog komesara, a koji je nejasan u sadašnjem Zakonu, vezano za odabir, imenovanje i smjenjivanje policijskog komesara. Sastav Odbora ostaje nepromjenjen (sedam članova). Mandat Odbora će i dalje biti četiri godine ali su ugrađene jasne odredbe kojim se uređuje kontinuitet njegovog rada po isteku mandata do imenovanja novog Nezavisnog odbora. Eksplicitno su navedeni uslovi za izvještavanje i odlučivanje. Nezavisni odbor upravlja postupkom izbora policijskog komesara i predlaže dva kandidata Vladi. Vlada ima isključivu nadležnost za imenovanje.

Poglavlje VI ugrađuje mehanizme za utvrđivanje disciplinske odgovornosti policijskog komesara. Ovo je jedna od glavnih novina u nacrtu jer trenutno policijski komesar ne odgovara disciplinski iako je policijski službenik.

Poglavlje VII uređuje osnivanje, nadležnosti, izbor, imenovanje, kvalifikacione kriterije za članove, smjenu članova i trajanje mandata Odbora za žalbe javnosti. Cilj je da se prevaziđu nedostaci primjećeni u prošlosti jer postojeći Zakon ne reguliše detaljno institut Odbora za žalbe javnosti.

Poglavlje VIII uređuje kategorije zaposlenika u Ministarstvu koje uključuju državne službenike, namještenike i policijske službenike dajući mogućnost Ministarstvu da odredi ograničen broj radnih mjesta za državne službenike i namještenike koja zahtijevaju posebne uslove rada za djelotvorno funkcionisanje Ministarstva i koji će primati dodatak uz platu. Nadalje, ovo poglavlje uređuje stručno osposobljavanje uposlenika, dodjeljivanje priznanja, pohvala i nagrada uposlenicima.

Poglavlje IX prikladnije uređuje saradnju između kantonalne policije i drugih policijskih organa u BiH.

Predviđena je i saradnja policijskih organa u krivičnim stvarima.


Poglavlje X sadrži prelazne i završne odredbe. Ovim odredbama se regulišu podzakonski akti koji se trebaju usvojiti radi implementacije ovog Zakona. Sadrži i odredbu o imenovanju Nezavisnog odbora i Odbora za pritužbe javnosti, kao i odredbe o raspodjeli sredstava između Ministarstva unutrašnjih poslova i Uprave policije

III - FINANSIJSKA SREDSTVA POTREBNA ZA PROVOĐENJE OVOG ZAKONA

Provođenje ovog Zakona ne zahtjeva dodatna finansijska sredstva.

16 Mar. 2015 11:50 P 1

Bosna i Hercegovina
Federacija Bosne i Hercegovine
KANTON SARAJEVO
Ministarstvo pravde i uprave



Bosnia and Herzegovina
Federation of Bosnia and Herzegovina
CANTON SARAJEVO
Ministry of Justice and Administration
BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
MINISTARSTVO UNUTRAŠNJIH POSLOVA
SARAJEVO

Broj: 03-04-02-2731/15
Sarajevo, 24.02.2015. godine

Primljeno:	03-03-2015		
Org. jed.	Broj	Priloga	Vrijednost
01			

MINISTARSTVO UNUTRAŠNJIH POSLOVA
KANTONA SARAJEVO
Ul. La Benevolencija br. 16

03-03-2015
513/15

PREDMET: Mišljenje o uskladenosti nacrtu Zakona o unutrašnjim poslovima Kantona Sarajevo sa Evropskom konvencijom o zaštiti ljudskih prava i osnovnih sloboda i drugim pravnim aktima kojima je utvrđena zaštita ljudskih prava


U skladu sa odredbama člana 7. Zakona o organizaciji i djelokrugu organa uprave i upravnih organizacija Kantona Sarajevo ("Službene novine Kantona Sarajevo", br. 2/12-Prečišćeni tekst i 41/12) i člana 7. stav 2. Uredbe o načinu i pripremanja, izrade i dostavljanja propisa ("Službene novine Kantona Sarajevo", br. 21/11-Novi prečišćeni tekst i 30/11), na zahtjev Ministarstva unutrašnjih poslova broj 01-01-93/15 od 19.02.2015. godine, Ministarstvo pravde i uprave razmotrilo je nacrt zakona i dalje slijedeće

MIŠLJENJE

Nacrt Zakona o unutrašnjim poslovima Kantona Sarajevo nije u suprotnosti sa odredbama Evropske konvencije o zaštiti ljudskih prava i osnovnih sloboda kao ni sa drugim pravnim aktima kojima je utvrđena zaštita ljudskih prava.

S poštovanjem,

Dostaviti:
① Naslovu;
2. a/a.



MINISTRICA

Velida Memić
Velida Memić, dipl. pravnik



web: <http://mpu.ks.gov.ba>
e-mail: pravda@ks.gov.ba
Tel: + 387 (0) 33 562-083, Fax: + 387 (0) 33 562-241
Sarajevo, Rcisa Džemaludina Čauševića 1



Bosna i Hercegovina
Federacija Bosne i Hercegovine



Bosnia and Herzegovina
Federation of Bosnia and Herzegovina

10-03-2015

563/15

KANTON SARAJEVO
Ured za zakonodavstvo
Vlade Kantona Sarajevo

CANTON SARAJEVO
Office for legislature of Sarajevo Canton
Government

Broj: 09-02-2728/15
Sarajevo, 09.03.2015. godine

KANTON SARAJEVO
MINISTARSTVO UNUTRAŠNJIH POSLOVA

BOSNA I HERCEGOVINA FEDERACIJA BOSNE I HERCEGOVINE KANTON SARAJEVO MINISTARSTVO UNUTRAŠNJIH POSLOVA SARAJEVO			
Primijeno: 10-03-2015			
Org. jed.	Broj	Priloga	Vrij. post.
01			

PREDMET: Stručno mišljenje na nacrt Zakona o unutrašnjim poslovima Kantona Sarajevo.-

V e z a : Vaš akt broj: 01-93/15 od 19.02.2015. godine.-

Na osnovu člana 2. Uredbe o Uredu za zakonodavstvo Vlade Kantona Sarajevo ("Službene novine Kantona Sarajevo", broj: 7/06-Prečišćeni tekst) i čl. 4. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", br. 21/11-Novi prečišćeni tekst i 30/11-Ispravka), Ured za zakonodavstvo Vlade Kantona Sarajevo, daje slijedeće

MIŠLJENJE

1. Ured za zakonodavstvo Vlade Kantona Sarajevo nema primjedbi na dostavljeni tekst nacrta Zakona o unutrašnjim poslovima Kantona Sarajevo po pitanju njegove usaglašenosti sa odredbama ustava, kao i odredbama Federalnog zakona o unutrašnjim poslovima i drugih propisa koji su navedeni u obrazloženju predmetnog materijala.

Nacrt zakona o unutrašnjim poslovima Kantona Sarajevo može poslužiti kao dobra polazna osnova za pripremu što kvalitetnijeg prijedloga Zakona.

2. Primjedbe normativno-tehničke prirode:

2.1. u čl. 6. st. (3) iza riječi: "...Vlada Kantona...", dodati riječ: "...Sarajevo...", (u daljem tekstu: Vlada Kantona), a iza riječi: "...ministar...", pisati riječi: "unutrašnjih poslova Kantona Sarajevo" (u daljem tekstu: ministar);

2.2. u čl. 7. st. (1) iza riječi: "...ministru..." pisati tačku, a ostali dio teksta brisati;

2.3. u čl. 7. st. (2) iza riječi: "... Vladi Kantona..." brisati riječi: "...Sarajevo...", (u daljem tekstu: Vlada Kantona);

2.4. u čl. 7. st. (3) gramatički pravilno pisati riječ: "... budžetska sredstva...";

2.5. u čl. 9. st. (2) umjesto skraćenice FBiH, pisati riječ: "...Federacije...";



web: <http://uz.ks.gov.ba>
e-mail: ured@ks.gov.ba
Tel/fax: + 387 (0) 33 560-448
Sarajevo, Hamida Dizdara 1



2.6. u čl. 15. st. (1) iza riječi: "...Pravilnik o unutrašnjoj organizaciji Ministarstva..." dodati riječi: (u daljem tekstu: Pravilnik), te u skladu s tom primjedbom u st. (2) i (3) iza riječi: "Pravilnika", brisati riječi: "o unutrašnjoj organizaciji", a isto se odnosi i na čl. 16. st. (1), u istom članu stav (3) tač. f) otkloniti štamparsku grešku u pisanju riječi: "pripravnika";

2.7. u čl. 19. tač. a) umjesto skraćenice: "...BiH...", pisati: "Bosni i Hercegovini", a ista primjedba se odnosi na čl. 20. st. (2) tač. j) i k); čl. 26. tač. e); čl. 34. tač. a), f) g) i j); čl. 75., 76., 77., 78., 79., 80., 82., 84. st. (1) tač. b) i c) i st. (2), ista primjedba se odnosi da se umjesto skraćenice "FBiH", piše: Federacija, a u skladu sa članom 2. nacrta Zakona;

2.8. u čl. 21. u st. (1) i (2) iza riječi: "...Vlada...", pisati riječ: "Kantona";

2.9. u čl. 28. st. (3) pravilno pisati riječ: "najkasnije";

2.10. u članu 32. tačke umjesto brojevima (1) do (8), pisati slovima počev od a) do h);

2.11. u članu 35. st. (1) riječ: "...javnim...", pisati malim početnim slovom;

2.12. u članu 36. st. (3) tačke od a) do e) pisati sa samo jednom zagradom, kao što je to urađeno u cijelom tekstu nacrta Zakona;

2.13. u članu 56. riječ: "...kantona...", pisati velikim početnim slovom;

2.14. u članu 58. st. (1) riječ: "odbora", pisati velikim početnim slovom, a u st. (2) riječ: "Komisija" pisati u odgovarajućem padežu (Komisije);


2.15. u nazivu člana 59. brisati riječi: "za žalbe";

2.16. u članu 66. st. (2) riječ: "kantona" pisati velikim početnim slovom;

2.17. u članu 87. st. (1) riječ: "Ministar" pisati malim početnim slovom.

Dostaviti:

1. Naslovu
2. Evidencija
3. Arhiva



SEKRETAR

Ahmed Ljubović, dipl.pravnik



web: <http://uz.ks.gov.ba>
e-mail: ured@ks.gov.ba
Tel/fax: + 387 (0) 33 560-448
Sarajevo, Hamida Dizdara 1





Broj:08-03-02- 2730/15
Sarajevo, 23.02.2015. god.


**MINISTARSTVO UNUTRAŠNJIH POSLOVA
KANTONA SARAJEVO
O V D J E**

PREDMET: Mišljenje
Veza: vaš broj: 01-93/15 od 19.02.2015.god.

U skladu s članom 3. stav (4) Uredbe o postupku i načinu pripremanja , izrade i dostavljanja propisa („Službene novine Kantona Sarajevo“, br. 21/11- Novi prečišćeni tekst i 30/11) , dajemo slijedeće mišljenje:
Nacrt zakona o o unutrašnjim poslovima Kantona Sarajevo nije u suprotnosti sa finansijskim propisima.

Za provođenje ovog zakona nije potrebno planirati dodatna finansijska sredstva u Budžetu Kantona Sarajevo.

Pripremila- Avdić Z.



MINISTAR

[Signature]
Medžad Kozadra, dipl. ecc.



web: <http://mf.ks.gov.ba>
e-mail: mf@mf.ks.gov.ba
Tel: + 387 (0) 33 565-005, Cent.+ 387 (0) 33 565-000
Fax: + 387 (0) 33 565-052 i 565-048
Sarajevo, Maršala Tita 62





Broj:08-03-02- 2730/15
Sarajevo, 23.02.2015. god.

**MINISTARSTVO UNUTRAŠNJIH POSLOVA
KANTONA SARAJEVO
O V D J E**


PREDMET: Mišljenje
Veza: vaš broj: 01-93/15 od 19.02.2015.god.

U skladu s članom 3. stav (4) Uredbe o postupku i načinu pripremanja , izrade i dostavljanja propisa („Službene novine Kantona Sarajevo“, br. 21/11- Novi prečišćeni tekst i 30/11) , dajemo slijedeće mišljenje:

Nacrt zakona o o unutrašnjim poslovima Kantona Sarajevo nije u suprotnosti sa finansijskim propisima.

Za provođenje ovog zakona nije potrebno planirati dodatna finansijska sredstva u Budžetu Kantona Sarajevo.

Pripremila- Avdić Z.



MINISTAR

[Signature] Mehmed Kozadra, dipl. ecc.



web: <http://mf.ks.gov.ba>
e-mail: mf@mf.ks.gov.ba;
Tel: + 387 (0) 33 565-005, Cent.+ 387 (0) 33 565-000
Fax: + 387 (0) 33 565-052 i 565-048
Sarajevo, Maršala Tita 62





**SINDIKAT POLICIJE KANTONA SARAJEVO
TRADE UNION OF POLICE CANTON SARAJEVO**

Labenevolencije broj 16, 71000 Sarajevo, BiH,
Telefoni Predsjednik 061/192-041, Sekretar 061/107-418,

E-mail: sindikatpolicijeks@gmail.com

Web: <http://www.sindikatpolicijeks.co.ba/>

Žiro račun broj 3389002206056557 Unicreditbank Sarajevo ID broj
4200318910000



Broj: SPKS-120/15
Datum: 23.02.2015. godine

**Ministarstvo unutrašnjih poslova Kantona Sarajevo
- n/r ministra -**

PREDMET: Nacrt Zakona o unutrašnjim poslovima Kantona Sarajevo, s a g l a s n o s t,
dostavlja se,-

Veza : Vaš akt broj: 01-93/15 od 19.02.2015. godine, -

Upravni odbor Sindikata policije Kantona Sarajevo je povodom dostavljenog Nacrta Zakona o unutrašnjim poslovima Kantona Sarajevo održao tematsku sjednicu, kojom prilikom je usvojen zaključak da Sindikat policije Kantona Sarajevo **daje saglasnost** na odredbe istog.



PREDSJEDNIK UO SPKS

Đozo Nedžib

12-02-2015

5/3

FAX

Emerika Bluma 1, 71000 Sarajevo
Phone: +(387-33) 283500 Fax: +(387-33) 283501

Datum: 12. februar 2015. godine

Za:

Nermin Pećanac
Ministar unutrašnjih poslova Kantona Sarajevo 033 226 445

Kopija:

Delegacija Evropske unije u BiH i
Specijalni predstavnik Evropske unije u BiH 033 668 390

Ambasada Sjedinjenih Američkih Država u BiH 033 659 722

Vlada Kantona Sarajevo - svim ministrima 033 565 052

Skupština Kantona Sarajevo - svim zastupnicima 033 562 210

Vahid Ćosić
Polijski komesar Uprave policije Kantona Sarajevo 033 201 705

Stranica: 3, uključujući i ovu

Message:

Poštovani,

U prilogu se nalazi pismo Visokog predstavnika gosp. Valentina Inzka.

(01)
645/15
13.02.2015
-02/PPK-1
0-02/2
130315
Jant. Mar
g. Lejla
B-7u

Dr. Valentin Inzko
The High Representative for Bosnia and Herzegovina

Mr. Nermin Pecanac
Minister of Internal Affairs of Sarajevo Canton


12 February 2015

Dear Minister Pecanac,

I would like to take this opportunity to express my sincere appreciation for your outstanding cooperation in developing an updated Law on Internal Affairs of Sarajevo Canton (the Law). The Law further entrenches the legal and budgetary independence of the Administration of Police as measures for more efficient and professional police work and for effective barriers against improper political influence over policing.

I note with great appreciation that the suggestions, prepared by my Office in close consultation with the EU and the US, are accurately incorporated in the Law. Please be assured that OHR, the EU and the US stand ready to support the speedy adoption of the Law, as characterized above, and believe that this law should serve as a model for new internal affairs legislation in the Cantons. Also I hope that we will achieve the same results in an ongoing drafting process of a new Law on Police Officials of Sarajevo Canton that will address and remedy identified shortcomings.

Sincerely,



CC:

- Delegation of the European Union to BiH and the EU Special Representative in BiH
- Embassy of the United States of America to BiH
- Government of Sarajevo Canton – all Ministers
- Assembly of Sarajevo Canton – all Deputies
- Mr. Vahid Cosic, Police Commissioner

OHR

Office of the High Representative for Bosnia and Herzegovina
E. Bluma 1, 71000 Sarajevo, Bosnia and Herzegovina
Tel.: ++387 33 283 500 Fax: ++387 33 283 501

Gosp. Nermin Pećanac
Ministar unutrašnjih poslova Kantona Sarajevo

Poštovani ministre Pećanac,

Izuzetno cijenim što su prijedlozi, koje je moj Ured pripremio u bliskoj saradnji sa EU i SAD, dosljedno uvršteni u Zakon. Budite uvjereni da su OHR, EU i SAD spremni da pruže podršku brzom usvajanju Zakona, sa prethodno navedenim uvrštenim prijedlozima, te vjerujemo da bi ovaj Zakon trebao da posluži kao model za legislativu u oblasti unutrašnjih poslova u ostalim kantonima. Također se nadam da ćemo ostvariti iste rezultate i u procesu izrade novog Zakona o policijskim službenicima Kantona Sarajevo, na kojem se trenutno radi, a koji će identifikovati i ispraviti uočene nedostatke.

Valentin Inzko

- Delegacija Evropske unije u BiH i Specijalni predstavnik Evropske unije u BiH
- Ambasada Sjedinjenih Američkih Država u BiH
- Vlada Kantona Sarajevo - svim ministrima
- Skupština Kantona Sarajevo - svim zastupnicima
- Gosp. Vahid Ćosić, policijski komesar